

श्रीः
श्रीमते रामानुजाय नमः
श्रीमते निगमान्तमहादेशिकाय नमः

कृष्णायजुर्वेदीय आरण्यके
॥ चतुर्थः प्रश्नः ॥

This document has been prepared by

Sunder Kidāmbi

with the blessings of

श्री रङ्गरामानुज महादेशिकन्

His Holiness śrīmad āṇḍavan śrīraṅgam

श्रीः
श्रीमते रामानुजाय नमः
श्रीमते निगमान्तमहादेशिकाय नमः

॥ चतुर्थः प्रश्नः ॥

॥ हरिः ओ(४)म् ॥

ओं नमोऽनुमदन्तु।

ओं शान्तिः शान्तिः शान्तिः ॥

नमो वाचे या चौदिता या चानुदिता
तस्यै वाचे नमो नमो वाचे नमो वाचस्पतये
नम ऋषिभ्यो मन्त्रकृद्भ्यो मन्त्रपतिभ्यो
मा मामृषयो मन्त्रकृतो मन्त्रपतयः
परादुर्माऽहमृषीन्मन्त्रकृतो
मन्त्रपतीन्परादां वैश्वदेवीं
वाचमुद्यासगं शिवामदस्तां जुष्टां
देवेभ्यश्शर्म मे द्यौश्शर्म पृथिवी
शर्म विश्वमिदं जगत्।
शर्म चन्द्रश्च सूर्यश्च शर्म ब्रह्मप्रजापती।
भूतं वदिष्ये भुवनं वदिष्ये तेजो वदिष्ये
यशो वदिष्ये तपो वदिष्ये ब्रह्म वदिष्ये
सत्यं वदिष्ये तस्मा अहमिदमुपस्तरणमुपस्तृण

Please let us know of any errors in this text.

उप॒स्तर॑णं मे प्र॒जायै॑ पशू॒नां भू॒यादुप॒स्तर॑णम॒हं
 प्र॒जायै॑ पशू॒नां भू॒यासं॑ प्राणा॑पानौ
 मृ॒त्योर्मा॑ पातं प्राणा॑पानौ मा मा॑ हासिष्टं
 मधु॑ मनिष्ये मधु॑ जनिष्ये मधु॑ वक्ष्यामि
 मधु॑ वदिष्यामि मधु॑मतीं दे॒वेभ्यो॑
 वाच॑मुद्यासगं शुश्रूषे॒ण्यां मनु॒ष्येभ्य॑स्तं मा॑
 दे॒वा अ॑वन्तु शो॒भायै॑ पि॒तरोऽनु॑मदन्तु।
 ओं शान्तिः॒ शान्तिः॒ शान्तिः॑ ॥ 1 ॥ ॥ 1 ॥

युञ्जते॒ मनं॑ उ॒त युञ्जते॒ धियः॑।
 वि॒प्रा वि॒प्रस्य॑ बृ॒हतो वि॒पश्चितः॑।
 वि हो॒त्रा दधे॑ वयुना॒विदेक॑ इत्।
 म॒ही दे॒वस्य॑ सवि॒तुः परि॑ष्टुतिः।
 दे॒वस्य॑ त्वा सवि॒तुः प्र॑स॒वे।
 अ॒श्विनो॑र्बा॒हुभ्या॑म्।
 पू॒ष्णो ह॑स्ता॒भ्यामा॑ददे।
 अ॒भ्रिर॑सि ना॒रिर॑सि।
 अ॒ध्वर॑कृ॒द्दे॒वेभ्यः॑।
 उत्ति॑ष्ठ ब्रह्मणस्पते ॥ 2 ॥

दे॒व॒यन्त॑स्त्वेमहे।
 उप॒प्रय॑न्तु म॒रुत॑स्सुदान॑वः।

इन्द्रं प्राशूर्भवा सचा॥
 प्रैतु ब्रह्मणस्पतिः।
 प्र देव्येतु सूनृता॥
 अच्छा वीरं नर्यं पङ्क्तिराधसम्।
 देवा यज्ञं नयन्तु नः।
 देवीं द्यावापृथिवी अनु मेऽमगंसाथाम्।
 ऋद्ध्यसमद्य।
 मखस्य शिरः ॥ 3 ॥

मखाय त्वा।
 मखस्य त्वा शीर्ष्णे।
 इयत्यग्रं आसीः।
 ऋद्ध्यसमद्य।
 मखस्य शिरः।
 मखाय त्वा।
 मखस्य त्वा शीर्ष्णे।
 देवीर्वम्रीरस्य भूतस्य प्रथमजा ऋतावरीः।
 ऋद्ध्यसमद्य।
 मखस्य शिरः ॥ 4 ॥

मखाय त्वा।
 मखस्य त्वा शीर्ष्णे।

इन्द्र॒स्यौजो॑ऽसि।
ऋ॒द्ध्य्वास॑म॒द्य।
म॒खस्य॑ शिरः॑।
म॒खाय॑ त्वा।
म॒खस्य॑ त्वा शी॒र्ष्णे।
अ॒ग्नि॒जा अ॑सि प्र॒जाप॑ते॒ रेतः॑।
ऋ॒द्ध्य्वास॑म॒द्य।
म॒खस्य॑ शिरः॑ ॥ 5 ॥

म॒खाय॑ त्वा।
म॒खस्य॑ त्वा शी॒र्ष्णे।
आयु॑र्धेहि प्रा॒णं धे॑हि।
अ॒पानं॑ धे॑हि व्या॒नं धे॑हि।
चक्षु॑र्धेहि श्रो॒त्रं धे॑हि।
मनो॑ धे॑हि वाचं॑ धे॑हि।
आ॒त्मानं॑ धे॑हि प्रति॒ष्ठां धे॑हि।
मां धे॑हि मयि॑ धे॑हि।
मधु॑ त्वा मधु॒ला क॑रोतु।
म॒खस्य॑ शिरो॑सि ॥ 6 ॥

य॒ज्ञस्य॑ प॒दे स्थः॑।
गा॒य॒त्रेण॑ त्वा॒ छन्द॑सा करोमि।

त्रैष्टु॑भेन त्वा॒ छन्द॑सा करोमि।
जाग॑तेन त्वा॒ छन्द॑सा करोमि।
म॒खस्य॑ रा॒स्ना॑ऽसि।
अदि॑तिस्ते॒ बिलं॑ गृह्णातु।
पाङ्क्ते॑न॒ छन्द॑सा।
सूर्य॑स्य॒ हर॑सा श्राय।
म॒खो॑ऽसि ॥ 7 ॥

प॒ते शि॑रं ऋ॒तावरी॑र् ऋ॒द्ध्यसा॑म॒द्य म॒खस्य॑
शि॒रश्शि॑र॒श्शिरो॑ऽसि॒ नवं॑ च ॥ 2 ॥

इय॑ति॒ देवी॑रिन्द्र॒स्यो॒जो॑ऽस्यग्नि॒जा
अ॒स्यायु॑र्धेहि प्रा॒णं पञ्च॑ ॥

वृष्णो॑ अश्व॑स्य नि॒ष्पद॑सि।
वरु॑णस्त्वा धृ॒तव्र॑त॒ आधू॑पयतु।
मि॒त्रावरु॑णयोर्ध्रु॒वेण॑ धर्म॒णा।
अ॒र्चिषे॑ त्वा।
शो॒चिषे॑ त्वा।
ज्योति॑षे त्वा।
तप॑से त्वा।
अ॒भीमं॑ म॒हिना॑ दिव॑म्।
मि॒त्रो ब॑भूव स॒प्रथाः॑।
उ॒त श्रव॑सा पृथि॒वीम् ॥ 8 ॥

मि॒त्रस्य॑ च॒र्षणी॑धृतः।
 श्रवो॑ दे॒वस्य॑ सा॒न॒सिम्।
 द्यु॒म्रं चि॒त्रश्र॑वस्तमम्।
 सि॒द्ध्यै॑ त्वा।
 दे॒वस्त्वा॑ स॒वि॒तो॒द्व॒पतु॑।
 सु॒पा॒णि॒स्स्व॑ङ्गु॒रिः।
 सु॒बा॒हुरु॒त श॑क्त्या॑।
 अ॒प॑द्य॒मानः॑ पृथि॒व्याम्।
 आशा॑ दि॒श॒ आपृ॑ण।
 उ॒त्ति॑ष्ठ बृ॒हन्भ॑व ॥ १ ॥

ऊ॒र्ध्व॑स्ति॑ष्ठ ध्रु॒वस्त्वम्।
 सूर्य॑स्य त्वा॒ चक्षु॑षाऽन्वी॑क्षे।
 ऋ॒जवे॑ त्वा।
 सा॒धवे॑ त्वा।
 सु॒क्षि॒त्यै त्वा॒ भू॒त्यै॑ त्वा।
 इ॒दम॒हम॒मुमा॑मु॒ष्याय॑णं वि॒शा
 प॒शुभि॑र्ब्रह्मवर्च॒सेन॑ पर्यू॒हामि॑।
 गा॒य॒त्रेण॑ त्वा॒ छ॒न्द॒साऽऽच्छृ॑णन्मि।
 त्रैष्टु॑भेन त्वा॒ छ॒न्द॒साऽऽच्छृ॑णन्मि।
 जा॒ग॑तेन त्वा॒ छ॒न्द॒साऽऽच्छृ॑णन्मि।

छृणत्तु॑ त्वा॒ वाक्।
 छृणत्तु॑ त्वोर्क्।
 छृणत्तु॑ त्वा ह॒विः।
 छृन्धि॑ वाच॑म्।
 छृन्ध्यूर्ज॑म्।
 छृन्धि॑ ह॒विः।
 देव॑ पुरश्चर स॒ध्यासं॑ त्वा ॥ 10 ॥

पृथि॒वीं भ॑व॒ वाख्बट्च॑ ॥ 3 ॥

ब्रह्म॑न्प्रव॒र्ग्येण॑ प्रच॑रिष्यामः।
 होत॑र्घ॒र्मम॒भिष्टु॑हि।
 अग्नी॒द्रौहि॑णौ पुरो॒डाशा॒वधि॑श्रय।
 प्रति॑प्रस्थात॒र्विह॑र।
 प्रस्तो॑त॒स्सामा॑नि गाय।
 यजु॑र्युक्त॒गं साम॑भिराक्त॒खं त्वा।
 विश्वै॑र्दे॒वैरनु॑मतं म॒रुद्धिः॑।
 दक्षि॑णाभिः प्रत॑तं पारयि॒ष्णुम्।
 स्तुभो॑ वहन्तु सुमन॒स्यमा॑नम्।
 स नो॒ रुचं॑ धे॒ह्यहृ॑णीयमानः।
 भूर्भुव॑स्सुवः।
 ओमिन्द्र॑वन्तः प्रच॑रत ॥ 11 ॥

अह॑णीय॒मानो॒ द्वे च॑ ॥ 4 ॥

ब्र॒ह्मन्प्रच॑रिष्यामः।
 होत॑र्घ॒र्मम॒भिष्टु॑हि।
 य॒माय॑ त्वा म॒खाय॑ त्वा।
 सूर्य॑स्य॒ हर॑से त्वा।
 प्रा॒णाय॒ स्वाहा॑ व्या॒नाय॒ स्वाहा॑ऽप॒नाय॒ स्वाहा॑।
 चक्षु॑षे॒ स्वाहा॒ श्रोत्रा॑य॒ स्वाहा॑।
 मन॑से॒ स्वाहा॑ वा॒चे सर॑स्वत्यै॒ स्वाहा॑।
 दक्षा॑य॒ स्वाहा॒ ऋत॑वे॒ स्वाहा॑।
 ओज॑से॒ स्वाहा॒ बला॑य॒ स्वाहा॑।
 दे॒वस्त्वा॑ सवि॒ता म॒ध्वाऽन॑क्तु ॥ 12 ॥

पृथि॒वीं तप॑स॒स्त्राय॑स्व।
 अ॒र्चिर॑सि शो॒चिर॑सि॒ ज्योति॑रसि॒ तपो॑सि।
 सगं॑ सी॒दस्व॑ म॒हागं॑ अ॒सि।
 शोच॑स्व दे॒ववी॑तमः।
 विधू॑मम॒ग्ने अरु॑षं मि॒येध्य॑।
 सृ॒ज प्र॑शस्त द॒र्शत॑म्।
 अ॒ज्जन्ति॒ यं प्र॒थय॑न्तो॒ न वि॒प्राः।
 व॒पाव॑न्तं॒ नाग्नि॑ना॒ तप॑न्तः।

पि॒तुर्न पु॒त्र उ॒पसि॒ प्रेष्ठः॑ ।
आ घ॒र्मो अ॒ग्नि॒मृ॒तय॑न्नसादीत् ॥ 13 ॥

अ॒ना॒धृ॒ष्या पु॒रस्ता॑त् ।
अ॒ग्ने॒राधि॑पत्ये ।
आयु॑र्मे दाः ।
पु॒त्रव॑न्ती दक्षिण॒तः ।
इन्द्र॑स्याधि॑पत्ये ।
प्र॒जां मे॑ दाः ।
सु॒षदा॑ प॒श्चात् ।
दे॒वस्य॑ सवि॒तुराधि॑पत्ये ।
प्रा॒णं मे॑ दाः ।
आश्रु॑तिरुत्त॒रतः॑ ॥ 14 ॥

मि॒त्रावरु॑णयो॒राधि॑पत्ये ।
श्रो॒त्रं मे॑ दाः ।
वि॒धृ॒तिरु॒परि॑ष्ठात् ।
बृ॒ह॒स्पते॑राधि॑पत्ये ।
ब्र॒ह्मं मे॑ दाः क्ष॒त्रं मे॑ दाः ।
तेजो॑ मे॒ धा॒ वर्चो॑ मे॒ धाः ।
यशो॑ मे॒ धा॒स्तपो॑ मे॒ धाः ।
मनो॑ मे॒ धाः ।

मनोरश्वा॑ऽसि॒ भूरि॑पुत्रा।
विश्वा॑भ्यो मा ना॒ष्ट्राभ्यः॑ पाहि ॥ 15 ॥

सूप॒सदा॑ मे भूया॒ मा मां॑ हि॒गंसीः॑।
तपो॒ष्वग्ने॒ अन्तरा॑गं अ॒मित्रान्॑।
तपा॒ शगं॑समर॒रुषः॑ पर॑स्य।
तपा॑ वसो चिकितानो अ॒चित्तान्॑।
वि ते॑ तिष्ठन्ताम॒जरा॑ अ॒यासः॑।
चित॑स्स्थ परि॒चितः॑।
स्वाहा॑ म॒रुद्भिः॑ परि॑श्रयस्व।
मा अ॑सि।
प्र॒मा अ॑सि।
प्र॒ति॒मा अ॑सि ॥ 16 ॥

स॒म्मा अ॑सि।
वि॒मा अ॑सि।
उ॒न्मा अ॑सि।
अ॒न्तरि॑क्षस्यान्त॒र्धिर॑सि।
दिवं॑ तप॑सस्त्रायस्व।
आ॒भिर्गी॑र्भिर्यदतो॑ न ऊ॒नम्।
आप्या॑यय हरिवो॒ वर्ध॑मानः।
य॒दा स्तो॑तृभ्यो॒ महि॑ गो॒त्रा रु॒जासि॑।

भूयिष्ठभाजो अघं ते स्याम।
शुक्रं ते अन्यद्यजतं ते अन्यत् ॥ 17 ॥

विषुरूपे अहनी द्यौरिवासि।
विश्वा हि माया अवसि स्वधावः।
भद्रा ते पूषन्निह रातिरस्तु।
अर्हन्बिभर्षि सायकानि धन्वं।
अर्हन्निष्कं यजतं विश्वरूपम्।
अर्हन्निदं दयसे विश्वमभुवम्।
न वा ओजीयो रुद्र त्वदस्ति।
गायत्रमसि।
त्रैष्टुभमसि।
जागतमसि।
मधु मधु मधु ॥ 18 ॥

अनक्त्वसादीदुत्तरतः पाहि प्रतिमा असि यजतं ते
अन्यज्जागतमस्येकं च ॥ 5 ॥

दश प्राचीर्दश भासि दक्षिणा।
दश प्रतीचीर्दश भास्युदीचीः।
दशोर्ध्वा भासि सुमनस्यमानः।
स नो रुचं धेह्यहणीयमानः।
अग्निष्वा वसुभिः पुरस्ताद्रोचयतु

गाय॒त्रेण॒ छन्द॑सा।
स मा॑ रुचि॒तो रो॑चय।
इन्द्र॑स्त्वा रु॒द्रैर्दक्षि॑णतो रोचयतु
त्रैष्टु॑भेन॒ छन्द॑सा।
स मा॑ रुचि॒तो रो॑चय।
वरु॑णस्त्वाऽऽदि॒त्यैः प॒श्चाद्रो॑चयतु जाग॑तेन॒ छन्द॑सा।
स मा॑ रुचि॒तो रो॑चय ॥ 19 ॥

द्यु॒ता॒नस्त्वा॑ मा॒रुतो॑ म॒रुद्भि॑रुत्त॒रतो॑
रोच॑य॒त्वानु॑ष्टुभेन॒ छन्द॑सा।
स मा॑ रुचि॒तो रो॑चय।
बृह॑स्पति॑स्त्वा॒ विश्वै॑र्दे॒वैरु॒परि॑ष्टाद्रोचयतु
पाङ्क्ते॑न॒ छन्द॑सा।
स मा॑ रुचि॒तो रो॑चय।
रोचि॑तस्त्वं दे॒व घ॑र्म दे॒वेष्व॑सि।
रोचि॑षी॒याहं॑ म॒नुष्ये॑षु।
सम्रा॑ङ्घर्म रुचि॑तस्त्वं दे॒वेष्वायु॑ष्माग्स्तेज॒स्वी
ब्र॑ह्मवर्च॒स्यसि॑।
रुचि॑तोऽहं म॒नुष्ये॑ष्वायु॑ष्माग्स्तेज॒स्वी
ब्र॑ह्मवर्च॒सी भू॑यासम्।

रुगंसि।

रुचं मयि धेहि ॥ 20 ॥

मयि रुक्।

दशं पुरस्ताद्रोचसे।

दशं दक्षिणा।

दशं प्रत्यङ्।

दशोदङ्।

दशोर्ध्वो भांसि सुमनस्यमानः।

स नस्सम्राडिषमूर्जं धेहि।

वाजी वाजिने पवस्व।

रोचितो घर्मो रुचीय ॥ 21 ॥

रोचय धेहि नवं च ॥ 6 ॥

अपश्यं गोपामनिपद्यमानम्।

आ च परां च पथिभिश्चरन्तम्।

स सद्घ्रीचीस्स विषूचीर्वसानः।

आवरीवर्ति भुवनेष्वन्तः।

अत्र प्रावीः।

मधुमाध्वीभ्यां मधुमाधूचीभ्याम्।

अनुं वां देववीतये।

समग्निरग्निना गत।

सं दे॒वेन॑ सवि॒त्रा।
सगं॑ सू॒र्येण॑ रोचते ॥ 22 ॥

स्वाहा॑ सम॒ग्निस्तप॑सा गत।
सं दे॒वेन॑ सवि॒त्रा।
सगं॑ सू॒र्येणारो॑चिष्ट।
ध॒र्ता दि॒वो विभा॑सि रज॑सः।
पृथि॒व्या ध॒र्ता।
उ॒रोर॒न्तरि॑क्षस्य ध॒र्ता।
ध॒र्ता दे॒वो दे॒वाना॑म्।
अम॑र्त्यस्तपो॒जाः।
हृ॒दे त्वा॒ मन॑से त्वा।
दि॒वे त्वा॒ सू॒र्याय॑ त्वा ॥ 23 ॥

ऊ॒र्ध्वमि॒मम॑ध्व॒रं कृ॑धि।
दि॒वि दे॒वेषु॑ हो॒त्रा यच्छ॑।
विश्वा॑सां भुवां पते।
विश्व॑स्य भुवनस्पते।
विश्व॑स्य मनसस्पते।
विश्व॑स्य वचसस्पते।
विश्व॑स्य तपसस्पते।
विश्व॑स्य ब्रह्मणस्पते।

दे॒व॒श्रू॒स्त्वं दे॒व घ॒र्म दे॒वान्पा॑हि ।
त॒पो॒जां वाच॑म॒स्मे निय॑च्छ दे॒वायु॑व॒म् ॥ 24 ॥

ग॒र्भो दे॒वाना॑म् ।
पि॒ता म॑ती॒नाम् ।
पतिः॑ प्र॒जाना॑म् ।
मतिः॑ क॒वीना॑म् ।
सं दे॒वो दे॒वेन॑ स॒वित्रा॑ऽयतिष्ठ ।
स॒गं सूर्ये॑णारु॒क्त ।
आ॒यु॒र्दास्त्वम॒स्मभ्यं॑ घ॒र्म व॒र्चो॒दा अ॑सि ।
पि॒ता नो॑ऽसि पि॒ता नो॑ बोध ।
आ॒यु॒र्धास्त॑नू॒धाः प॑यो॒धाः ।
व॒र्चो॒दा व॑रि॒वो॒दा द्र॑वि॒णो॒दाः ॥ 25 ॥

अ॒न्त॒रि॒क्षप्र॒ उ॒रोर्व॑री॒यान् ।
अ॒शी॒महि॑ त्वा॒ मा मा॑ हि॒गं॒सीः ।
त्वम॑ग्ने गृ॒हप॑तिर्वि॒शाम॑सि ।
विश्वा॑सां॒ मानु॑षी॒णाम् ।
श॒तं पू॒र्भिर्य॑विष्ठ पा॒ह्यग॑ह॒सः ।
स॒मे॒द्धार॑गं श॒तगं॑ हि॒माः ।
तं द्रा॒विण॑गं हा॒र्दिवा॑नम् ।
इ॒हैव रा॒तय॑स्सन्तु ।

त्वष्टी॑मती॒ ते स॒पेय॑ ।
सुरे॑ता॒ रेतो॑ द॒धाना॑ ।
वी॒रं वि॑देय॒ तव॑ सं॒दृशि॑ ।
माऽह॑गं रा॒यस्पोषे॑ण॒ वियो॑षम् ॥ 26 ॥

रोच॑ते॒ सूर्या॑य॒ त्वा दे॒वायु॑वं॒ द्रवि॑णो॒दा द॒धाना॑ द्वे च ॥ 7 ॥

दे॒वस्य॑ त्वा स॒वितुः॑ प्र॒स॒वे ।
अ॒श्विनो॑र्बा॒हुभ्या॑म् ।
पू॒ष्णो ह॑स्ता॒भ्यामा॑ददे ।
अदि॑त्यै॒ रास्ना॑ऽसि ।
इड॒ एहि॑ ।
अदि॑त॒ एहि॑ ।
सर॑स्व॒त्येहि॑ ।
असा॒वेहि॑ ।
असा॒वेहि॑ ।
असा॒वेहि॑ ॥ 27 ॥

अदि॑त्या उ॒ष्णीष॑मसि ।
वा॒युर॑स्यै॒डः ।
पू॒षा त्वो॒पाव॑सृजतु ।
अ॒श्विभ्या॑ प्रदा॑पय ।
यस्ते॒ स्तन॑श्शश॒यो यो म॑यो॒भूः ।

येन॑ विश्वा॒ पुष्य॑सि॒ वार्या॑णि।
यो र॑त्न॒धा व॑सु॒विद्य॑स्सु॒दत्रः॑।
सर॑स्वति॒ तमि॒ह धा॑त॒वेऽकः॑।
उस्रं॑ घ॒र्मगं॑ शि॒ग्ष।
उस्रं॑ घ॒र्म पा॑हि ॥ 28 ॥

घ॒र्माय॑ शि॒ग्ष।
बृह॑स्पति॒स्त्वोप॑सीदतु।
दान॑वस्स्थ॒ पेर॑वः।
वि॒ष्व॒ग्वृ॒तो लो॑हि॒तेन॑।
अ॒श्विभ्या॑॑ पि॒न्वस्व॑।
सर॑स्वत्यै पि॒न्वस्व॑।
पू॒ष्णे पि॑न्वस्व।
बृह॑स्पत॒ये पि॑न्वस्व।
इन्द्रा॑य पि॒न्वस्व॑।
इन्द्रा॑य पि॒न्वस्व॑ ॥ 29 ॥

गा॒य॒त्रोऽसि॑।
त्रैष्टु॑भोसि।
जाग॑तमसि।
स॒होर्जो॑ भा॒गेनो॒प मेहि॑।
इन्द्रा॑श्विना॒ मधु॑न॒स्सार॑घस्य॑।

घ॒र्म॑ पा॒त वस॑वो॒ यज॑न्ता॒ वट्।
 स्वाहा॑ त्वा॒ सूर्य॑स्य॒ रश्म॑ये॒ वृष्टि॒वन॑ये जुहोमि।
 मधु॑ ह॒विर॑सि।
 सूर्य॑स्य॒ तप॑स्तप।
 द्यावा॑पृथि॒वीभ्यां॑ त्वा॒ परि॑गृह्णामि ॥ 30 ॥

अ॒न्तरि॑क्षेण॒ त्वोप॑यच्छामि।
 दे॒वानां॑ त्वा॒ पित॑रुणामनु॒मतो॒ भर्तु॑ग्ं शकेयम्।
 तेजो॑ऽसि।
 तेजो॑ऽनुप्रेहि।
 दि॒वि॒स्पृङ्गा॑ मां हि॒गंसीः॑।
 अ॒न्तरि॑क्ष॒स्पृङ्गा॑ मां हि॒गंसीः॑।
 पृथि॒वि॒स्पृङ्गा॑ मां हि॒गंसीः॑।
 सुव॑रसि॒ सुव॑र्मे यच्छ।
 दि॒वं यच्छ॑ दि॒वो मां॑ पाहि ॥ 31 ॥

एहि॑ पाहि पि॒न्वस्व॑ गृह्णामि॒ नवं च॑ ॥ 8 ॥

स॒मु॒द्राय॑ त्वा॒ वाता॑य॒ स्वाहा॑।
 स॒लि॒लाय॑ त्वा॒ वाता॑य॒ स्वाहा॑।
 अ॒ना॒धृष्या॑य॒ त्वा॒ वाता॑य॒ स्वाहा॑।
 अ॒प्र॒ति॒धृष्या॑य॒ त्वा॒ वाता॑य॒ स्वाहा॑।
 अ॒व॒स्य॑वे॒ त्वा॒ वाता॑य॒ स्वाहा॑।

दु॒व॑स्वते त्वा॒ वाता॑य॒ स्वाहा॑ ।
 शि॒मि॑द्वते त्वा॒ वाता॑य॒ स्वाहा॑ ।
 अ॒ग्रये॑ त्वा॒ वसु॑मते॒ स्वाहा॑ ।
 सोमा॑य त्वा रु॒द्रव॑ते॒ स्वाहा॑ ।
 वरु॑णाय त्वाऽऽदि॒त्यव॑ते॒ स्वाहा॑ ॥ 32 ॥

बृ॒ह॒स्पत॑ये त्वा वि॒श्वदे॑व्यावते॒ स्वाहा॑ ।
 स॒वि॒त्रे त्व॑र्भुमते॒ विभु॑मते॒ प्रभु॑मते॒
 वाज॑वते॒ स्वाहा॑ ।
 य॒माय॒ त्वाऽङ्गि॑रस्वते पितृमते॒ स्वाहा॑ ।
 विश्वा॑ आशा॑ दक्षिण॒सत् ।
 विश्वा॑न्दे॒वान॑याडि॒ह ।
 स्वाहा॑कृतस्य घ॒र्मस्य॑ ।
 मधो॑ः पिबतमश्विना ।
 स्वाहा॑ऽग्रये॑ य॒ज्ञिया॑य ।
 शं यजु॑र्भिः ।
 अश्वि॑ना घ॒र्म पा॑तग्ं हा॒र्दिवा॑नम् ॥ 33 ॥

अह॑र्दि॒वाभि॑रू॒तिभिः॑ ।
 अनु॑ वा॒ द्यावा॑पृथि॒वी मग्ं॑साताम् ।
 स्वाहे॑न्द्राय ।
 स्वाहे॑न्द्रा॒ वट् ।

घर्ममपातमश्विना हार्दिवानम्।
अहर्दिवाभिरूतिभिः।
अनु वां द्यावापृथिवी अमगंसाताम्।
तं प्राव्यं यथा वट्।
नमो दिवे।
नमः पृथिव्यै ॥ 34 ॥

दिवि धां इमं यज्ञम्।
यज्ञमिमं दिवि धाः।
दिवं गच्छ।
अन्तरिक्षं गच्छ।
पृथिवीं गच्छ।
पञ्च प्रदिशो गच्छ।
देवान्घर्मपान्गच्छ।
पितृन्घर्मपान्गच्छ ॥ 35 ॥

आदित्यवन्ते स्वाहा हार्दिवानं पृथिव्या अष्टौ च ॥ 9 ॥

इषे पीपिहि।
ऊर्जे पीपिहि।
ब्रह्मणे पीपिहि।
क्षत्राय पीपिहि।
अद्भ्यः पीपिहि।

ओषधीभ्यः पीपिहि।
 वनस्पतिभ्यः पीपिहि।
 द्यावापृथिवीभ्यां पीपिहि।
 सुभूताय पीपिहि।
 ब्रह्मवर्चसाय पीपिहि ॥ 36 ॥

यजमानाय पीपिहि।
 मह्यं ज्यैष्ठ्याय पीपिहि।
 त्विष्यै त्वा।
 द्युम्नाय त्वा।
 इन्द्रियाय त्वा भूत्यै त्वा।
 धर्माऽसि सुधर्मा मे न्यस्मे।
 ब्रह्माणि धारय।
 क्षत्राणि धारय।
 विशं धारय।
 नेत्वा वातस्स्कन्दयात् ॥ 37 ॥

अमुष्यं त्वा प्राणे सादयामि।
 अमुनां सह निरर्थं गच्छ।
 योऽस्मान्द्वेष्टि।
 यं च वयं द्विष्मः।
 पूष्णे शरसे स्वाहा।

ग्राव॑भ्य॒स्स्वाहा॑ ।
 प्रति॒रेभ्य॒स्स्वाहा॑ ।
 द्यावा॑पृथि॒वीभ्याग्॒ स्वाहा॑ ।
 पि॒तृभ्यो॑ घ॒र्मपेभ्य॒स्स्वाहा॑ ।
 रु॒द्रायं रु॒द्रहो॑त्रे॒ स्वाहा॑ ॥ 38 ॥

अ॒ह॒र्ज्योतिः॑ के॒तुना॑ जुषताम् ।
 सु॒ज्योति॒र्ज्योति॑षाग्॒ स्वाहा॑ ।
 रा॒त्रि॒र्ज्योतिः॑ के॒तुना॑ जुषताम् ।
 सु॒ज्योति॒र्ज्योति॑षाग्॒ स्वाहा॑ ।
 अ॒पी॒परो॑ माऽहो रा॒त्रि॒यै मा पाहि॑ ।
 ए॒षा ते॑ अ॒ग्ने स॒मित् ।
 तया॑ स॒मिद्ध्य॑स्व ।
 आ॒यु॒र्मे दाः॑ ।
 वर्च॑सा माऽञ्जीः ।
 अ॒पी॒परो॑ मा॒ रा॒त्रि॒या अ॒हो मा पाहि॑ ॥ 39 ॥

ए॒षा ते॑ अ॒ग्ने स॒मित् ।
 तया॑ स॒मिद्ध्य॑स्व ।
 आ॒यु॒र्मे दाः॑ ।
 वर्च॑सा माऽञ्जीः ।
 अ॒ग्नि॒र्ज्योति॒र्ज्योति॑र॒ग्नि॒स्स्वाहा॑ ।

सूर्यो॑ ज्योति॒र्ज्योति॒स्सूर्य॒स्स्वाहा॑ ।
 भूस्स्वाहा॑ ।
 हु॒तगं॑ ह॒विः ।
 मधु॑ ह॒विः ।
 इन्द्र॑तमे॒ऽग्नौ ।
 पि॒ता नो॑ऽसि॒ मा मां॑ हि॒गंसीः॑ ।
 अ॒श्यामं॑ ते देव॒ घर्म॑ ।
 मधु॑मतो॒ वाज॑वतः॒ पितु॑मतः ।
 अङ्गि॑रस्वतस्स्वधा॒विनः॑ ।
 अ॒शीमहि॑ त्वा॒ मा मां॑ हि॒गंसीः॑ ।
 स्वाहा॑ त्वा॒ सूर्य॑स्य र॒श्मिभ्यः॑ ।
 स्वाहा॑ त्वा॒ नक्ष॑त्रेभ्यः ॥ 40 ॥

ब्र॒ह्मव॑र्चसायं पीपिहि॒ स्क॒न्दया॑द्बु॒द्रायं॑ रु॒द्रहो॑त्रे
 स्वाहा॑ऽहो॑ मा पा॒ह्यग्नौ॑ स॒प्त च॑ ॥ 10 ॥

घर्म॑ या ते॒ दि॒वि शुक् ।
 या गा॑य॒त्रे छ॒न्दसि॑ ।
 या ब्रा॑ह्म॒णे ।
 या ह॑वि॒र्धानि॑ ।
 तां तं॑ ए॒तेना॑व॒यजे॒ स्वाहा॑ ।
 घर्म॑ या ते॒ऽन्तरि॑क्षे॒ शुक् ।

या त्रैष्टु॒भे छ॒न्द॑सि।
 या रा॑ज॒न्यै॑।
 याऽऽग्नी॑द्धे।
 तां तं ए॒तेना॑व॒यजे॒ स्वाहा॑ ॥ 41 ॥

घ॒र्म॒ या तै॑ पृथि॒व्याग्ं शुक्।
 या जा॑ग॒ते छ॒न्द॑सि।
 या वैश्यै॑।
 या स॑द॒सि।
 तां तं ए॒तेना॑व॒यजे॒ स्वाहा॑।
 अ॒नु॒ नोऽद्या॑नु॒मतिः॑।
 अ॒न्विद॑नु॒मते॒ त्वम्।
 दि॒वस्त्वा॑ पर॒स्पायाः॑।
 अ॒न्तरि॑क्षस्य त॒नुवः॑ पाहि।
 पृथि॒व्यास्त्वा॒ धर्म॑णा ॥ 42 ॥

व॒यम॑नु॒क्रामा॑म सु॒वि॒ताय॒ नव्य॑से।
 ब्र॒ह्म॑णस्त्वा पर॒स्पायाः॑।
 क्ष॒त्रस्य॑ त॒नुवः॑ पाहि।
 वि॒शस्त्वा॒ धर्म॑णा।
 व॒यम॑नु॒क्रामा॑म सु॒वि॒ताय॒ नव्य॑से।
 प्रा॒णस्य॑ त्वा पर॒स्पायै॑।

चक्षुषस्तनुवः पाहि।
 श्रोत्रस्य त्वा धर्मणा।
 वयमनुक्रामाम सुविताय नव्यसे।
 वल्गुरसि शंयुधायाः ॥ 43 ॥

शिशुर्जनधायाः।
 शं च वक्षि परिं च वक्षि।
 चतुस्रक्तिर्नाभिर्ऋतस्य।
 सदा विश्वायुश्शर्म सप्रथाः।
 अप द्वेषो अप ह्वरः।
 अन्यद्व्रतस्य सश्चिम।
 घर्मैतत्तेऽन्नमेतत्पुरीषम्।
 तेन वर्धस्व चा चं प्यायस्व।
 वर्धिषीमहि च वयम्।
 आ चं प्यासिषीमहि ॥ 44 ॥

रन्तिर्नामासि दिव्यो गन्धर्वः।
 तस्य ते पद्वद्धविर्धानम्।
 अग्निरध्यक्षाः।
 रुद्रोऽधिपतिः।
 समहमायुषा।
 सं प्राणेन।

सं वर्चसा।
 सं पयसा।
 सं गौपत्येन।
 सगं रायस्पोषेण ॥ 45 ॥

व्यसौ।
 योऽस्मान्द्वेष्टि।
 यं च वयं द्विष्मः।
 अचिक्रद्वृषा हरिः।
 महान्मित्रो न दर्शतः।
 सगं सूर्येण रोचते।
 चिदसि समुद्रयोनिः।
 इन्दुर्दक्षश्शयेन ऋतावा।
 हिरण्यपक्षश्शकुनो भुरण्युः।
 महान्धसधस्थे ध्रुव आनिषत्तः ॥ 46 ॥

नमस्ते अस्तु मा मां हिगंसीः।
 विश्वावसुगं सोमगन्धर्वम्।
 आपो ददृशुषीः।
 तदृतेना व्यायन्।
 तदन्ववैत्।
 इन्द्रो रारहाण आसाम्।

परि॑ सूर्य॑स्य परि॒धी॒गं॑रपश्यत्।
 वि॒श्वाव॑सुर॒भि तन्नो॑ गृणातु।
 दि॒व्यो ग॑न्ध॒र्वो रज॑सो वि॒मानः॑।
 यद्वा॑ घा स॒त्यमु॑त यन्न वि॒द्म ॥ 47 ॥

धियो॑ हिन्वा॒नो धिय॑ इन्नो॑ अव्यात्।
 सस्त्रि॑मविन्द॒च्चरणे॑ न॒दीना॑म्।
 अपा॑वृणो॒द्दुरो॑ अश्म॑व्रजानाम्।
 प्रासा॑ गन्ध॒र्वो अ॒मृता॑नि वोचत्।
 इन्द्रो॑ दक्षं॒ परि॑जानाद॒हीन॑म्।
 ए॒तत्त्वं दे॑व घर्म॒ देवो॑ दे॒वानु॑पा॒गाः।
 इ॒दम॒हं म॑नुष्यो॑ मनुष्यान्।
 सोम॑पी॒थाऽनु॑ मेहि॑।
 स॒ह प्र॒जया॑ स॒ह रा॒यस्पोषे॑ण।
 सुमि॑त्रा न॒ आप॑ ओष॑धयस्सन्तु ॥ 48 ॥

दुर्मि॑त्रास्तस्मै॑ भूयासुः।
 यो॑ऽस्मान्द्वेष्टि॑।
 यं च॑ व॒यं द्वि॒ष्मः।
 उद्व॑यं तम॑स॒स्परि॑।
 उदु॑ त्यं चि॒त्रम्।
 इ॒ममू॑ षु॒ त्यम॒स्मभ्य॑ग्ं स॒निम्।

गा॒य॒त्रं न॒वी॒या॒गं॒सम् ।
अ॒ग्ने॑ दे॒वेषु॑ प्र॒वोचः॑ ॥ 49 ॥

याऽऽग्नी॑द्ध्ये तां तं ए॒तेना॑व॒यजे॒ स्वाहा॑ ध॒र्मणा॑ श॒युधा॑याः
प्या॒सिषी॑महि॒ पोषे॑ण॒ निष॑त्तो वि॒द्म स॑न्त्व॒ष्टौ च॑ ॥ 11 ॥

म॒हीनां॑ प॒योऽसि॑ वि॒हितं॑ दे॒वत्रा॑ ।
ज्यो॒तिर्भा॑ अ॒सि व॒न॒स्पती॑ना॒मोष॑धी॒नागुं॑ र॒सः ।
वा॒जिनं॑ त्वा वा॒जिनो॑ऽव॒नया॑मः ।
ऊ॒र्ध्वं म॑न॒स्सुव॑र्गम् ॥ 50 ॥ ॥ 12 ॥

अ॒स्कान्द्यौः॑ पृ॒थि॒वीम् ।
अ॒स्कानृ॑ष॒भो यु॒वा गाः॑ ।
स्क॒न्नेमा॑ वि॒श्वा भु॑व॒ना ।
स्क॒न्नो य॒ज्ञः प्र॑ज॒नय॑तु ।
अ॒स्कान॑ज॒नि प्रा॑ज॒नि ।
आ स्क॒न्नाञ्जा॑यते॒ वृषा॑ ।
स्क॒न्नात्प्र॑ज॒निषी॑महि ॥ 51 ॥ ॥ 13 ॥

या पु॒रस्ता॑द्विद्युदाप॑तत् ।
तां तं ए॒तेना॑व॒यजे॒ स्वाहा॑ ।
या दक्षि॑ण॒तः ।
या प॒श्चात् ।
योत्त॑र॒तः ।

योपरि॑ष्टाद्विद्यु॑दाप॑तत्।

तां तं ए॒तेना॑व॒यजे॒ स्वाहा॑ ॥ 52 ॥ ॥ 14 ॥

प्रा॒णाय॒ स्वाहा॑ व्या॒नाय॒ स्वाहा॑ऽपा॒नाय॒ स्वाहा॑।

चक्षु॑षे॒ स्वाहा॒ श्रोत्रा॑य॒ स्वाहा॑।

मन॑से॒ स्वाहा॑ वा॒चे सर॑स्वत्यै॒ स्वाहा॑ ॥ 53 ॥ ॥ 15 ॥

पू॒ष्णे स्वाहा॑ पू॒ष्णे शर॑से॒ स्वाहा॑।

पू॒ष्णे प्र॑प॒थ्याय॒ स्वाहा॑ पू॒ष्णे न॒रन्धि॑षाय॒ स्वाहा॑।

पू॒ष्णेऽङ्घ्रि॑णये॒ स्वाहा॑ पू॒ष्णे न॒रुणा॑य॒ स्वाहा॑।

पू॒ष्णे सा॑के॒ताय॒ स्वाहा॑ ॥ 54 ॥ ॥ 16 ॥

उद॑स्य॒ शुष्मा॑द्भानु॒नार्त॑ बिभ॑र्ति।

भा॒रं पृ॑थि॒वी न भू॑मं।

प्र शु॒क्रैतुं॑ दे॒वी म॑नी॒षा।

अ॒स्मत्सु॑त॒ष्टो रथो॒ न वा॒जी।

अ॒र्चन्त॑ ए॒के म॑हि॒ सामं॑ म॒न्वत॑।

तेन॒ सूर्य॑मधारयन्।

तेन॒ सूर्य॑मरोचयन्।

घ॒र्मशि॑शिर॒स्तद॒यम॑ग्निः।

पु॒रीष॑मसि॒ संप्रि॑यं प्र॒जया॑ प॒शुभि॑र्भुवत्।

प्रजापतिस्त्वा सादयतु।

तया देवतयाऽङ्गिरस्वद्ध्रुवा सीद ॥ 55 ॥ ॥ 17 ॥

यास्ते अग्र आर्द्रा योनयो याः कुलायिनीः।

ये ते अग्र इन्दवो या उ नाभयः।

यास्ते अग्रे तनुव ऊर्जो नाम।

ताभिस्त्वमुभयीभिस्संविदानः।

प्रजाभिरग्रे द्रविणेह सीद।

प्रजापतिस्त्वा सादयतु।

तया देवतयाऽङ्गिरस्वद्ध्रुवा सीद ॥ 56 ॥ ॥ 18 ॥

अग्रिरसि वैश्वानरोऽसि।

संवत्सरोऽसि परिवत्सरोऽसि।

इदावत्सरोऽसीदुवत्सरोऽसि।

इद्वत्सरोऽसि वत्सरोऽसि।

तस्य ते वसन्तशिशरः।

ग्रीष्मो दक्षिणः पक्षः।

वर्षाः पुच्छम्।

शरदुत्तरः पक्षः।

हेमन्तो मध्यम्।

पूर्वपक्षाश्चितयः ॥ 57 ॥

अ॒प॒र॒प॒क्षाः॑ पु॒री॒ष॒म्।
 अ॒हो॒रा॒त्रा॒णी॒ष्ट॒काः॑।
 तस्य॑ ते॒ मा॒साँश्चा॑र्ध॒मा॒साश्च॑ कल्पन्ताम्।
 ऋ॒त॒व॑स्ते कल्पन्ताम्।
 सं॒व॒थ्स॒र॒स्तै॑ कल्पताम्।
 अ॒हो॒रा॒त्रा॒णि॑ ते कल्पन्ताम्।
 ए॒ति॒ प्रे॒ति॒ वी॒ति॒ समि॑त्युदिति।
 प्र॒जा॒प॑तिस्त्वा सादयतु।
 तया॑ दे॒व॒त॑याऽङ्गि॒र॒स्व॒द्ध्रु॒व॒स्सी॑द ॥ 58 ॥

चित॑यो॒ न॒व॑ च ॥ 19 ॥

भूर्भु॑व॒स्सु॒वः॑।
 ऊ॒र्ध्व॑ ऊ॒ षु॒ णं॑ ऊ॒त॒र्यै॑।
 ऊ॒र्ध्वो॑ नः पा॒ह्य॒गं॑हसः।
 वि॒धुं॑ द॒द्रा॒ण॒गं॑ सम॒ने॑ ब॒हू॒ना॒म्।
 यु॒वा॑न॒गं॑ सन्तं प॒लि॒तो॑ जंगार।
 दे॒व॒स्य॑ प॒श्य॒ का॒व्यं॑ म॒हि॒त्वाऽद्या॑ म॒मारं॑।
 स ह्य॒स्स॒मा॑न।
 य॒दृ॒ते॑ चि॒द॒भि॒श्रि॒षः॑।
 पु॒रा॑ ज॒र्तृ॒भ्य॑ आ॒तृ॒दः॑।
 स॒न्धा॑ता स॒न्धिं॑ म॒घ॒वा॑ पु॒रो॒व॒सुः॑ ॥ 59 ॥

निष्कर्ता विहुतं पुनः।
 पुनरूर्जा सह रय्या।
 मा नो घर्म व्यथितो विव्यथो नः।
 मा नः परमधरं मा रजोऽनैः।
 मोष्वस्माग्स्तमस्यन्तरा धाः।
 मा रुद्रियांसो अभिगुर्वृधा नः।
 मा नः क्रतुभिर्हीडितेभिरस्मान्।
 द्विषां सुनीते मा परादाः।
 मा नो रुद्रो निर्ऋतिर्मा नो अस्ताः।
 मा द्यावापृथिवी हीडिषाताम् ॥ 60 ॥

उपं नो मित्रावरुणाविहावतम्।
 अन्वादीध्याथामिह नस्सखाया।
 आदित्यानां प्रसितिर्हेतिः।
 उग्रा शतापांष्टा घविषा परिणो वृणक्तु।
 इमं मे वरुण तत्त्वां यामि।
 त्वं नो अग्ने स त्वं नो अग्ने।
 त्वमग्ने अयाऽसि।
 उद्वयं तमसस्परि।
 उदु त्यं चित्रम्।
 वयस्सुपर्णाः ॥ 61 ॥

पुरोवसुर्हीडिषातागं सुपर्णाः ॥ 20 ॥

भूर्भुवस्सुवः।

मयि त्यदिन्द्रियं महत्।

मयि दक्षो मयि क्रतुः।

मयि धायि सुवीर्यम्।

त्रिशुग्धर्मो विभातु मे।

आकूत्या मनसा सह।

विराजा ज्योतिषा सह।

यज्ञेन पयसा सह।

ब्रह्मणा तेजसा सह।

क्षत्रेण यशसा सह।

सत्येन तपसा सह।

तस्य दोहमशीमहि।

तस्य सुम्नमशीमहि।

तस्य भक्षमशीमहि।

तस्य त इन्द्रेण पीतस्य मधुमतः।

उपहृतस्योपहृतो भक्षयामि ॥ 62 ॥

यशसा सह षट्च ॥ 21 ॥

यास्ते अग्ने घोरास्तनुवः।

क्षुच्च तृष्णा च।

अ॒स्रुक्॒चाना॑हु॒तिश्च॑ ।
अ॒श॒न॒या च॑ पि॒पा॒सा च॑ ।
से॒दि॒श्चा॒म॒तिश्च॑ ।
ए॒तास्ते॑ अ॒ग्ने घो॒रास्त॒नुवः॑ ।
ताभि॑र॒मुं ग॑च्छ ।
योऽस्मा॑न्द्वेष्टि॑ ।
यं च॑ व॒यं द्वि॒ष्मः ॥ 63 ॥ ॥ 22 ॥

स्नि॒क्च॒ स्नीहि॑तिश्च॒ स्निहि॑तिश्च ।
उ॒ष्णा च॑ शी॒ता च॑ ।
उ॒ग्रा च॑ भी॒मा च॑ ।
स॒दा॒म्री॑ से॒दि॒रनि॑रा ।
ए॒तास्ते॑ अ॒ग्ने घो॒रास्त॒नुवः॑ ।
ताभि॑र॒मुं ग॑च्छ ।
योऽस्मा॑न्द्वेष्टि॑ ।
यं च॑ व॒यं द्वि॒ष्मः ॥ 64 ॥ ॥ 23 ॥

धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ग्गश्च ।
नि॒लि॒म्पश्च॑ वि॒लि॒म्पश्च॑ वि॒क्षि॒पः ॥ 65 ॥ ॥ 24 ॥

उ॒ग्रश्च॑ धु॒निश्च॑ ध्वा॒न्तश्च॑ ध्व॒नश्च॑
ध्व॒नय॑ग्गश्च ।
स॒ह॒स॒हाग्श्च॑ स॒ह॒मा॒नश्च॑ स॒ह॒स्वाग्श्च॑

सहीयाग्श्च।

एत्य॑ प्रेत्य॑ विक्षि॒पः ॥ 66 ॥ ॥ 25 ॥

अ॒हो॒रा॒त्रे त्वोदी॑रयताम्।

अ॒र्ध॒मा॒सास्त्वोदी॑ञ्जयन्तु।

[अ॒र्ध॒मा॒सास्त्वोदी॑ङ्गयन्तु।]

मासा॑स्त्वा श्रपयन्तु।

ऋ॒तव॑स्त्वा पचन्तु।

सं॒व॒त्स॒रस्त्वा॑ हन्त्वसौ ॥ 67 ॥ ॥ 26 ॥

ख॒द्ग॒ङ्ग॒हि।

छि॒न्धी॑ भि॒न्धी॑ ह॒न्धी॑।

कडि॑ति॒ वाचः॑ कूरा॒णि ॥ 68 ॥ ॥ 27 ॥

[छि॒न्धी॑ भि॒न्धी॑ ह॒न्धी॑ कट्।

इति॑ वाचः॑ कूरा॒णि ॥ 68 ॥ ॥ 27 ॥]

विगा॑ इन्द्र॑ वि॒चर॑न्त्स्पाशयस्व।

स्व॒पन्त॑मिन्द्र॑ पशु॒मन्त॑मिच्छ।

वज्रै॑णा॒मुं बो॑धय दुर्वि॒दत्र॑म्।

स्व॒प॒तो॑ऽस्य॒ प्रह॑र् भोज॑नेभ्यः।

अग्ने॑ अ॒ग्नि॒ना॒ संव॑दस्व।

मृत्यो॑ मृ॒त्यु॒ना॒ संव॑दस्व।

नम॑स्ते अस्तु॒ भगवः॑।

स॒कृ॒त्ते॑ अ॒ग्रे॒ नमः॑ ।
द्वि॒स्ते॒ नमः॑ ।
त्रि॒स्ते॒ नमः॑ ।
च॒तु॒स्ते॒ नमः॑ ।
प॒ञ्च॒कृ॒त्वं॑स्ते॒ नमः॑ ।
द॒श॒कृ॒त्वं॑स्ते॒ नमः॑ ।
श॒त॒कृ॒त्वं॑स्ते॒ नमः॑ ।
आ॒स॒ह॒स्र॒कृ॒त्वं॑स्ते॒ नमः॑ ।
अ॒प॒रि॒मि॒त॒कृ॒त्वं॑स्ते॒ नमः॑ ।
नम॑स्ते अस्तु मा मां हि॒गं॒सीः ॥ 69 ॥

त्रि॒स्ते॒ नम॑स्सप्त च ॥ 28 ॥

असृ॑न्मुखो रुधि॒रेणा॒व्य॑क्तः ।
[असृ॑ङ्मुखो रुधि॒रेणा॒व्य॑क्तः ।]
य॒मस्य॑ दू॒तश्च॑पा॒द्विधा॑वसि ।
गृ॒ध्र॑स्सु॒पर्णः॑ कु॒णपं॑ निषे॒वसे॑ ।
य॒मस्य॑ दू॒तः प्रहि॑तो भ॒वस्य॑ चो॒भयोः॑ ॥ 70 ॥ ॥ 29 ॥

यदे॒तद्वृ॑क॒सो भू॒त्वा ।
वाग्दे॑व्यभि॒राय॑सि ।
द्विष॑न्तं मेऽभि॒राय॑ ।

तं मृत्यो मृत्यवे नय।
स आर्त्याऽऽर्तिमाच्छतु ॥ 71 ॥ ॥ 30 ॥

यदीषितो यदि वा स्वकामी।
भयेडको वदति वाचमेताम्।
तामिन्द्राग्नी ब्रह्मणा संविदानौ।
शिवामस्मभ्यं कृणुतं गृहेषु ॥ 72 ॥ ॥ 31 ॥

दीर्घमुखि दुरहणु।
मा स्म दक्षिणतो वदः।
यदि दक्षिणतो वदाद्विषन्तं
मेऽवबाधासै ॥ 73 ॥ ॥ 32 ॥

इत्थादुलूक आपसत्।
हिरण्याक्षो अयोमुखः।
रक्षसां दूत आगतः।
तमितो नाशयाग्ने ॥ 74 ॥ ॥ 33 ॥

यदेतद्भूतान्यन्वाविश्यं।
दैवीं वाचं वदसिं।
द्विषतो नः परावद।
तान्मृत्यो मृत्यवे नय।

त आ॒र्त्याऽऽर्ति॑मा॒र्च्छन्तु॑ ।
अ॒ग्निना॒ऽग्नि॑स्सं॒वद॑ताम् ॥ 75 ॥ ॥ 34 ॥

प्र॒सार्य॑ सु॒क्थ्यौ॑ पत॑सि ।
सु॒व्यम॑क्षि॑ नि॒पेपि॑ च ।
मेह॑ क॒स्यच॒नाम॑मत् ॥ 76 ॥ ॥ 35 ॥

अ॒त्रि॑णा॒ त्वा क्रि॑मे ह॒न्मि ।
क॒ण्वे॑न॒ ज॒मद॑ग्निना ।
वि॒श्वाव॑सो॒र्ब्रह्म॑णा॒ ह॒तः ।
क्रि॒मी॑णा॒गुं॒ राजा॑ ।
अ॒प्येषा॑ग् स्थ॒पति॑र् ह॒तः ।
अथो॑ मा॒ताऽथो॑ पि॒ता ।
अथो॑ स्थू॒रा अथो॑ क्षु॒द्राः ।
अथो॑ कृ॒ष्णा अथो॑ श्वे॒ताः ।
अथो॑ आ॒शाति॑का॒ ह॒ताः ।
श्वे॒ताभि॑स्स॒ह सर्वे॑ ह॒ताः ॥ 77 ॥ ॥ 36 ॥

आ॒हृ॒राव॑द्य ।
शृ॒तस्य॑ ह॒विषो॑ यथा॑ ।
तथ्स॒त्यम् ।
यद॒मुं य॒मस्य॑ ज॒म्भयोः॑ ।

आद॑धामि॒ तथा॒ हि॒ तत्।
खण्ण॑फण्ण॒सिं ॥ 78 ॥ ॥ 37 ॥

ब्रह्म॑णा॒ त्वा॒ शपामि॑।
ब्रह्म॑णस्त्वा॒ शपथे॑न शपामि।
घो॒रेण॑ त्वा॒ भृगू॑णां॒ चक्षु॑षा॒ प्रेक्षे॑।
रौ॒द्रेण॑ त्वाऽङ्गि॑रसां॒ मन॑सा॒ ध्यायामि॑।
अ॒घस्य॑ त्वा॒ धार॑या॒ विध्या॑मि।
अध॑रो॒ मत्प॑द्यस्वासौ ॥ 79 ॥ ॥ 38 ॥

उत्तु॑द शि॒मिजा॑वरि।
तल्पे॑जे॒ तल्प॑ उत्तु॑द।
गि॒रीग॑रनु॒प्रवेश॑य।
मरी॑चीरु॒प॒ सन्न॑द।
याव॑दि॒तः पुर॑स्ता॒दुदया॑ति॒ सूर्यः॑।
ताव॑दि॒तोऽमुं॑ नाशय।
योऽस्मान्द्वेष्टि॑।
यं च॑ व॒यं द्वि॒ष्मः ॥ 80 ॥ ॥ 39 ॥

भूर्भुव॑स्सुवो॒ भूर्भुव॑स्सुवो॒ भूर्भुव॑स्सुवः॑।
भुवो॑ऽद्धायि॒ भुवो॑ऽद्धायि॒ भुवो॑ऽद्धायि।
नृ॒म्णायि॑ नृ॒म्णं॑ नृ॒म्णायि॑ नृ॒म्णं॑
नृ॒म्णायि॑ नृ॒म्णम्।

नि॒धाय्यो॑ऽवायि नि॒धाय्यो॑ऽवायि नि॒धाय्यो॑ऽवायि।

ए अ॒स्मे।

अ॒स्मे सुव॒र्नज्योतीः॑ ॥ 81 ॥ ॥ 40 ॥

[ए अ॒स्मे अ॒स्मे।

सुव॒र्नज्योतीः॑ ॥ 81 ॥ ॥ 40 ॥]

पृथि॒वी स॒मित्।

ताम॒ग्निस्समि॑न्धे।

साऽग्नि॑ग्ं समि॑न्धे।

ताम॒हग्ं समि॑न्धे।

सा मा॒ समि॑द्धा।

आयु॑षा॒ तेज॑सा।

वर्च॑सा श्रि॒या।

यश॑सा ब्रह्मवर्च॑सेन।

अ॒न्नाद्ये॑न॒ समि॑न्ता॒ग्ं स्वाहा॑॥

अ॒न्तरि॑क्षग्ं स॒मित् ॥ 82 ॥

तां वा॒युस्समि॑न्धे।

सा वा॒युग्ं समि॑न्धे।

ताम॒हग्ं समि॑न्धे।

सा मा॒ समि॑द्धा।

आयु॑षा॒ तेज॑सा।

वर्चसा श्रिया।
यशसा ब्रह्मवर्चसेन।
अन्नाद्येन समिन्ताग् स्वाहा।
द्यौस्समित्।
तामादित्यस्समिन्धे ॥ 83 ॥

साऽऽदित्यगं समिन्धे।
तामहगं समिन्धे।
सा मा समिद्धा।
आयुषा तेजसा।
वर्चसा श्रिया।
यशसा ब्रह्मवर्चसेन।
अन्नाद्येन समिन्ताग् स्वाहा।
प्राजापत्या मे समिदसि सपत्नक्षयणी।
भ्रातृव्यहा मेऽसि स्वाहा।
अग्ने व्रतपते व्रतं चरिष्यामि ॥ 84 ॥

तच्छुकेयं तन्मे राध्यताम्।
वायो व्रतपत् आदित्य व्रतपते।
व्रतानां व्रतपते व्रतं चरिष्यामि।
तच्छुकेयं तन्मे राध्यताम्।
द्यौस्समित्।

तामा॑दित्य॒स्समि॑न्धे ।
 साऽऽदित्य॒ग्ं समि॑न्धे ।
 ताम॒हग्ं समि॑न्धे ।
 सा मा॒ समि॑द्धा ।
 आयु॑षा॒ तेज॑सा ॥ 85 ॥

वर्च॑सा श्रि॒या ।
 यश॑सा ब्रह्मवर्च॒सेन॑ ।
 अ॒न्नाद्ये॑न॒ समि॑न्ताग्ं॒ स्वाहा॑ ॥
 अ॒न्तरि॑क्षग्ं स॒मित् ।
 तां वा॒युस्समि॑न्धे ।
 सा वा॒युग्ं समि॑न्धे ।
 ताम॒हग्ं समि॑न्धे ।
 सा मा॒ समि॑द्धा ।
 आयु॑षा॒ तेज॑सा ।
 वर्च॑सा श्रि॒या ॥ 86 ॥

यश॑सा ब्रह्मवर्च॒सेन॑ ।
 अ॒न्नाद्ये॑न॒ समि॑न्ताग्ं॒ स्वाहा॑ ॥
 पृथि॒वी स॒मित् ।
 ताम॒ग्निस्समि॑न्धे ।
 साऽग्नि॑ग्ं समि॑न्धे ।

ताम॒ह॒ग्ं॒ समि॑न्धे।
सा मा॒ समि॑द्धा।
आयु॑षा॒ तेज॑सा।
वर्च॑सा श्रि॒या।
यश॑सा ब्रह्मवर्च॒सेन॑ ॥ 87 ॥

अ॒न्नाद्ये॑न॒ समि॑न्ता॒ग्ं॒ स्वाहा॑।
प्रा॒जा॒प॒त्या मे॑ स॒मिद॑सि सपत्न॒क्षय॑णी।
भ्रा॒तृ॒व्य॒हा मे॑ऽसि॒ स्वाहा॑।
आदि॑त्य व्रतपते व्र॒तम॑चारिषम्।
तद॑शकं॒ तन्मे॑ राधि।
वायो॑ व्रतप॒तेऽग्ने॑ व्रतपते।
व्र॒तानां॑ व्रतपते व्र॒तम॑चारिषम्।
तद॑शकं॒ तन्मे॑ राधि ॥ 88 ॥

स॒मि॒त्समि॑न्धे व्र॒तं च॑रि॒ष्याम्यायु॑षा॒ तेज॑सा॒ वर्च॑सा
श्रि॒या यश॑सा ब्रह्मवर्च॒सेना॒ष्टौ च॑ ॥ 41 ॥

शं नो॑ वा॒तः प॑वतां मा॒तरि॒श्व॒
शं न॑स्तपतु॒ सूर्यः॑।
अहा॑नि॒ शं भ॑वन्तु न॒श्शग्ं॑
रा॒त्रिः प्र॑ति॒ धी॑यताम्।
शमु॑षा नो॒ व्यु॑च्छतु

शमा॑दि॒त्य उ॒दे॒तु नः॑ ।
 शि॒वा न॒श्शन्त॑मा भव
 सु॒मृ॒डीका॑ सर॑स्वति ।
 मा ते॒ व्यो॑म स॒दृशि॑ ।
 इडा॑यै॒ वास्त्व॑सि वास्तु॒मद्वा॑स्तु॒मन्तो॑
 भूया॑स्म॒ मावा॑स्तो॒श्छि॑त्स्मह्यवा॒स्तुस्स
 भूया॑द्यो॒ऽस्मान्द्वेष्टि॑ यं च॒ व॒यं द्वि॑ष्मः ।
 प्र॒ति॒ष्ठाऽसि॑ प्र॒ति॒ष्ठाव॑न्तो भूया॑स्म॒ मा
 प्र॒ति॒ष्ठाया॑श्छि॑त्स्मह्यप्र॒ति॒ष्ठस्स
 भूया॑द्यो॒ऽस्मान्द्वेष्टि॑ यं च॒ व॒यं द्वि॑ष्मः ।
 आ वा॑त वाहि भेष॒जं वि वा॑तवाहि॒ यद्र॑पः ।
 त्वग्ं॑ हि वि॒श्वभे॑षजो दे॒वाना॑ दू॒त ई॒य॑से ।
 द्वावि॒मौ वा॒तौ वा॒त आ॒सिन्धो॒राप॑रा॒वतः॑ ॥ 89 ॥

दक्षं॑ मे अ॒न्य आ॒वा॒तु॒ परा॑ऽन्यो वा॒तु॒ यद्र॑पः ।
 यद॒दो वा॑त ते गृ॒हेऽमृ॑तस्य नि॒धिर् हितः॑ ।
 ततो॑ नो देहि जी॒वसे॒ ततो॑ नो धेहि भेष॒जम् ।
 ततो॑ नो॒ मह॑ आव॒ह वा॒त आ॒वा॒तु॒ भेष॑जम् ।
 श॒म्भूर्म॑यो॒भूर्नो॑ हृ॒दे प्र॑ण॒ आयू॑ग्ंषि तारिषत् ।
 इन्द्र॑स्य गृ॒हो॑ऽसि॒ तं त्वा॒ प्रप॑द्ये॒ सगु॑स्साश्वः ।
 स॒ह यन्मे॑ अ॒स्ति॒ तेन॑ ।

भूः प्रपद्ये भुवः प्रपद्ये सुवः प्रपद्ये
 भूर्भुवस्सुवः प्रपद्ये वायुं
 प्रपद्येऽना॑र्ता दे॒वतां
 प्रपद्येऽश्मा॑नमाखुणं
 प्रपद्ये प्र॒जाप॑तेर्ब्रह्मको॒शं
 ब्रह्म॒प्रपद्य॑ ओं प्रपद्ये।

अ॒न्तरि॑क्षं म उ॒र्वन्तरं॑ बृह॒द॒ग्र॒यः
 पर्व॑ताश्च॒ यया॒ वातः॑ स्व॒स्त्या
 स्व॑स्ति॒मान्त॑या॑ स्व॒स्त्या
 स्व॑स्ति॒मान॑सानि।

प्राणा॑पानौ मृत्यो॒र्मा पा॑तं
 प्राणा॑पानौ॒ मा मा॑ हासिष्टं
 मयि॑ मे॒धां मयि॑ प्र॒जां
 मय्य॒ग्नि॒स्तेजो॑ दधातु
 मयि॑ मे॒धां मयि॑ प्र॒जां
 मयीन्द्रं॑ इन्द्रि॒यं द॑धातु
 मयि॑ मे॒धां मयि॑ प्र॒जां
 मयि॑ सूर्यो॒ भ्राजो॑ दधातु ॥ 90 ॥

द्यु॒भिर॒क्तुभिः॑ परि॑पात॒म॒स्मान॑रि॒ष्टेभिर॑श्विना
 सौ॒भ॒गेभिः॑।

तन्नो॑ मि॒त्रो वरु॑णो मामह॒न्तामदि॑तिः

सिन्धुः॑ पृथि॒वी उ॒त द्यौः॑ ।

कया॑ नश्चि॒त्र आ भु॑वदूती स॒दावृ॑ध॒स्सखा॑ ।

कया॑ शचि॑ष्ठयाऽऽवृ॒ता ।

कस्त्वा॑ स॒त्यो मदा॑नां

मग॑हिष्ठो मथ्स॒दन्ध॑सः ।

दृ॒ढा चि॑दा॒रुजे॒ वसु॑ ।

अ॒भीषु॑ण॒स्सखा॑नामवि॒ता ज॑रितृ॒णाम् ।

श॒तं भ॑वास्यूतिभिः ।

वय॑स्सुप॒र्णा उप॑सेदु॒रिन्द्र॑

प्रि॒यमे॑धा ऋष॑यो॒ नाध॑मानाः ।

अप॑ध्वान्तमूर्णु॒हि पृ॑र्धि

चक्षु॑र्मुमु॒ग्ध्य॑स्मान्निधये॑ऽवब॒द्धान् ॥ 91 ॥

शं नो॑ दे॒वीर॒भिष्ट॑य॒ आपो॑ भवन्तु पी॒तये॑ ।

शं यो॒र॒भिस्र॑वन्तु नः ।

ईशा॑ना॒ वार्या॑णां॒ क्षय॑न्तीश्चर्षणी॒नाम् ।

अ॒पो या॑चामि भेष॒जम् ।

सु॒मि॒त्रा न॒ आप॒ ओष॑धयः सन्तु दु॒र्मि॒त्रास्तस्मै॑

भूया॑सु॒र्योऽस्मान्द्वेष्टि॑ यं च॑ व॒यं द्वि॒ष्मः॑ ।

आपो॑ हि॒ष्ठा म॑यो॒भुव॑स्ता न॒ ऊ॒र्जे द॑धातन ।

म॒हेर॑णाय॒ चक्ष॑से।

यो वः॑ शि॒वत॑मो॒ रस॒स्तस्य॑ भजयते॒ ह नः॑।

उ॒श॒तीरि॑व मा॒तरः॑।

तस्मा॒ अर॑ङ्गमाम वो॒ यस्य॒ क्षया॑य॒ जिन्व॑थ ॥ 92 ॥

आपो॑ ज॒नय॑था च नः।

पृथि॒वी शा॒न्ता साऽग्नि॑ना॒ शा॒न्ता

सा मे॑ शा॒न्ता शुच॑ग्ं शमयतु।

अ॒न्तरि॑क्षग्ं शा॒न्तं तद्वा॒युना॑ शा॒न्तं

तन्मे॑ शा॒न्तग्ं शुच॑ग्ं शमयतु।

द्यौश्शा॒न्ता साऽऽदि॒त्येन॑ शा॒न्ता

सा मे॑ शा॒न्ता शुच॑ग्ं शमयतु।

पृथि॒वी शान्ति॑र॒न्तरि॑क्षग्ं

शान्ति॑द्यौश्शान्ति॑र्दिश॒श्शान्ति॑

रवान्तरदिशाश्शान्ति॑

र॒ग्निश्शान्ति॑र्वा॒युश्शान्ति॑

रादि॒त्यश्शान्ति॑श्च॒न्द्रमा॒

श्शान्ति॑र्नक्ष॑त्राणि॒ शान्ति॑

राप॒श्शान्ति॑रोष॑धय॒श्शान्ति॑र्व॒नस्प॑त॒य

श्शान्ति॑र्गौश्शान्ति॑र्जा

शान्ति॑र॒श्वश्शान्ति॑ः

पुरुष॑श्शान्ति॒र्ब्रह्म॑श्शान्ति॒र्ब्राह्मि॑ण
 श्शान्ति॒श्शान्ति॑रे॒व
 शान्ति॒श्शान्ति॑र्मे अस्तु॒ शान्तिः॑ ।
 तया॒हगं॑ शान्त्या॒ सर्व॑शान्त्या
 मह्यं॑ द्वि॒पदे॑ चतु॒ष्पदे॑ च
 शान्तिं॑ करोमि॒ शान्ति॑र्मे अस्तु॒ शान्तिः॑ ।
 एह॑ श्रीश्च॒ ह्रीश्च॒ धृति॑श्च॒ तपो॑ मे॒धा
 प्रति॑ष्ठा श्रद्धा स॒त्यं धर्म॑श्चै॒तानि॑
 मोत्ति॑ष्ठन्त॒मनू॑त्तिष्ठन्तु॒ मा मा॒ग्
 श्रीश्च॒ ह्रीश्च॒ धृति॑श्च॒ तपो॑ मे॒धा प्रति॑ष्ठा
 श्रद्धा स॒त्यं धर्म॑श्चै॒तानि॑ मा॒ मा हा॑सिषुः ।
 उदायु॑षा स्वायु॒षोदोष॑धीना॒ग्
 रसे॒नोत्प॑र्जन्य॒स्य
 शुष्मे॒णोद॑स्थाम॒मृता॒ग् अनु॑ ।
 तच्चक्षु॑र्दे॒वहितं॑ पुरस्ता॑च्छुक्रमुच्चर॑त् ।
 पश्ये॑म श॒रद॑श्श॒तं जीवे॑म श॒रद॑श्श॒तं
 नन्दा॑म श॒रद॑श्श॒तं मोदा॑म श॒रद॑श्श॒तं
 भवा॑म श॒रद॑श्श॒तं श्रृणवा॑म श॒रद॑श्श॒तं
 प्रब्र॑वाम श॒रद॑श्श॒तमजी॑तास्स्याम
 श॒रद॑श्श॒तं ज्योक्च॑ सूर्यं॒ दृशे॑ ।
 य उद॑गान्मह॒तोऽर्णवा॑द्विभ्राज॑मानस्सरि॒रस्य॑

मध्या॒त्समा॑ वृष॒भो लो॑हि॒ताक्ष॒स्सूर्यो॑
 विप॒श्चिन्मन॑सा पुनातु।
 ब्रह्म॑णश्चो॒तन्य॑सि ब्रह्म॑ण आ॒णीस्थो॑
 ब्रह्म॑ण आ॒वप॑नमसि धा॒रि॒तेयं॑ पृथि॒वी
 ब्रह्म॑णा म॒ही धा॑रि॒तमे॑नेन म॒हद॒न्तरि॑क्षं
 दि॒वं दा॑धार पृथि॒वीग्ं सदै॑वां यद॒हं वेद॑
 तद॒हं धा॑रयाणि॒ मा म॒द्वेदोऽधि॑ वि॒स्रंस॑त्।
 मे॒धा॒म॒नी॒षे माऽऽवि॑शताग्ं स॒मीचीं॑
 भू॒तस्य॑ भ॒व्य॒स्याव॑रुद्ध्यै
 सर्व॑मायुरयाणि॒ सर्व॑मायुरयाणि।
 आ॒भिर्गी॑र्भिर्यदतो॑ न ऊ॒नमा॑प्यायय
 हरि॒वो वर्ध॑मानः।
 य॒दा स्तो॒तृभ्यो॑ महि॑ गो॒त्रारु॒जासि॑
 भूयि॑ष्ठभाजो॒ अध॑ ते स्याम।
 ब्रह्म॑ प्रावा॑दिष्म॒ तन्नो॑ मा हा॑सीत्।
 ओं शान्ति॑श्शान्ति॑श्शान्तिः॑ ॥ 93 ॥

प॒रा॒वतो॑ दधातु ब॒द्धाञ्जि॑न्वथ दृ॒शे स॒प्त च॑ ॥ 42 ॥

नमो॑ यु॒ञ्जते॑ वृष्णो॒ अश्व॑स्य॒ ब्रह्म॑न्प्रव॒र्ग्येण॑
 ब्रह्म॑न्प्रच॑रिष्यामो॒ दश॑ प्राची॒रप॑श्यं गो॒पां दे॒वस्य॑
 समु॒द्राये॑षे पी॑पिहि॒ घर्म॑ या ते॑ मही॒नां च॒त्वार्य॑स्कान्
 या पु॒रस्ता॑त्स॒प्त संस॑ प्रा॒णाय॑ त्रीणि॒ पूष्णे॑

च॒त्वार्यु॒दस्यै॑का॒दश॒ यास्ते॑ स॒प्ताग्नि॑र्ध्रु॒वस्सी॒दैका॒न्न
 वि॒गंश॑ति॒र्भूरु॒र्ध्वस्त्रि॑गं॒ शद्ध॑र्मयि॒ षोड॑श
 यास्ते॑ घो॒रा न॒व स्त्रि॑क्वा॒ऽष्टौ धु॒निश्च॒ द्वे उ॒ग्रश्च॒
 त्री॒ण्य॑हो॒रात्रे॒ पञ्च॒ खट्वा॑णि
 वि॒गास्स॑प्त॒दशा॑सृ॒न्मुख॑श्च॒त्वारि॒ यदे॒तद्वृ॑क॒सः पञ्च॒
 यदी॑पि॒तश्च॒त्वारि॒ दी॒र्घमु॑खि॒ त्री॒णी॒त्थाच्च॒त्वारि॒
 यदे॒तद्भू॒तानि॒ षट्प्र॑सार्य॒ त्री॒ण्यत्रि॑णा॒ दशा॑ह॒राव॑द्य॒ ब्रह्म॑णा॒
 षट् षडु॑त्तु॒दाष्टौ॒ भूष्प॑दृ॒थिव्य॑ष्ट॒षष्टि॑श्शं
 न॑स्स॒प्तप॑ञ्चा॒शदि॒द्वच॑त्वारि॒गं शत् ॥ 42 ॥

यु॒ञ्जते॒ ब्रह्म॑न्प्रच॒रिष्या॑मो॒ऽपश्यं॑ गो॒पागं॑ सं॒मुद्राय॑
 व॒यमनु॑क्रामाम॒ पूष्णे॒ धुनि॑श्च॒ यदे॒तद्भू॒तानि॒
 तच्छ॑के॒यम॒ष्टाशी॑तिः ॥ 88 ॥

नमो॑ वा॒चे ब्रह्म॑न्प्रव॒र्ग्येण॒ मयि॒ रुग॑न्तरि॒क्षेण॒
 घर्म॑ या॒ ते दि॒वि शु॒गस्का॒न्धौः पृ॑थि॒वीमु॑प॒नो
 मि॒त्रावरु॑णा॒ यदे॒तद्वृ॑क॒सो
 भूर्भु॒वस्सु॑व॒र्द्युभि॑स्त्रि॒णव॑तिः ॥ 93 ॥

ओं नमो॑ऽनु॒ मद॑न्तु।

ओं शान्ति॑श्शान्ति॑श्शान्तिः॑ ॥

॥ हरिः॑ ओ(३)म् ॥

॥ इति॑ चतुर्थः प्रश्नः समाप्तः ॥